


PRENSA A CERA CONOCI CU E EDIFICIO MAGNIFICO DI CENTRO DEPORTIVO PLAYA



ORANJESTAD (AAN) -- Ayera mainta Presidente di Fundacion Centro Deportivo Playa,

señor John Merryweather, hunto cu Sr. Leo de Hertog, director, a duna e prome conferencia di

prensa relaciona cu e compleho deportivo su instalacionnan, con nan ta funciona, con e ta bay worde mantene, den ki sentido e ta un facilidad comercial, y kico ta e diferencia entre e centro aki y otro instancianan deportivo.

Centro Deportivo Playa ta cay directamente bao di Ministro di Enseñanza Eddy Croes, ya cu e no ta cay dentro di e complehonan deportivo total, manera Idefre, stadion, y otronan bao maneho di Ministro Lili Beke, pero esaki ta un compleho educativo.

Merryweather ta splica: "contrario na tur e otro complehonan deportivo cu ta cay bao di maneho di Ministro Lili Beke, Centro Deportivo Playa ta cay bao di Ministro Eddy Croes, pasobra e ta un edificio cu ta parti di educacion fisico cu ta pertenece na estudio tambe".

Tur dia mainta te 2'or di atardi Colegio Arubano tin prioridad, y despues di 2'or sr. de Hertog ta tume over y e ta bira un instancia comercial pa particularnan.

MANEHO EN GENERAL: E ta worde guia independientemente pa un bestuur forma pa 5 persona, bao di presidencia di Sr. John Merryweather. Recientemente sr. Leo de Hertog a worde nombra como director di Centro Deportivo Playa.

"Nos ta considera sr. de Hertog como un Arubiano pasobra e tin hopi aña ta biba na Aruba, el a yega di traha como docente di Educacion Fisico na Colegio

Arubano, pa hopi aña el a hunga bala pa e equipo di R.C.A. Contra su gusto na dado momento el a bolbe Hulanda, pero semper e kier a bin bek Aruba.

Nos conoce de Hertog su caracter, e por traha cu hendenan local ya cu e tin nan mesun pensamiento y el a integra su mes na e comunidad Arubano", e presidente di e fundacion a bisa.

Ta asina cu e fundacion mes tin cu general su placa pa paga e director, y esnan cu ta mantene e compleho limpi y den bon condicion.

E docentenan di educacion fisico tin e derecho di haci uso di e sala pero nan ta cay bao di e fundacion di Colegio Arubano mes.

USO DI E CENTRO: Despues di e apertura oficial cu lo bira posiblemente dia 18 di februari venidero, e Centro Deportivo lo ta habri oficialmente pa publico tambe.

"Ora mi papia di publico mi ta referi na organizacionnan pero tambe hende individual, pero esaki ta keda na sr. de Hertog su derecho di admision. Pero nos kier invita tur organizacion cu kier bin mira y busca informacion pa bin for di awe mes, ya cu de Hertog ta henter dia den su oficina pa atende publico".

UN JOYA DI EDIFICIO:

Centro Deportivo Playa ta un joya di edificio, incluso un di esnan mas moderno den Caribe. "Ministro Eddy Croes su filosofia pa tur estudiante ta cu den 'curpa sano, mente sano' y e lema aki ta parti di e beleid di educacion fisico. E sala aki no ta pa haci deporte pero deporte guia pa instructornan profesional pa educacion fisico".

E profesionalnan aki no ta entrenadornan deportivo pero expertonan cu conoce bon e curpa humano y cu sa kico e hobennan mester na e diferente edadnan, kico nan por y kico no.

"Primeramente e centro ta pa studiantenan y despues pa e publico. E publico nos ta spera cu lo acudi den gran cantidad".

PROYECTO PA FUTURO:

Sr. Merryweather ta splica cu e proyecto pa futuro ta pa tin loke den pasado tabata tin den un club di cual e tabata presidente, y cu ta gimnasia pa hende muher na estado, esaki pa gruponan chiquito. Esaki entre otro ideanan cu tin intencion pa desaroya.

FINANCIAMIENTO: Logicamente tin gastonan envolvi pa cu mantenimiento di e Centro Deportivo.

"Nos ta bay percura pa tene e grstonan lo mas abao posible, pero un compleho asina boso por imagina e costonan enorme cu e ta encera. E gastonan aki nos ta bay trata di cubri nan no durante e prome aña pero poco poco y

nos ta bay mira na unda e gastonan ta haltu kico nos por haci sin cu nos kita for di henter e concepto di e gimnasio aki cu ta educacion fisico optimal pa e hubentud di Aruba. Esey ta primordial".

Pa traha e fondonan necesario pa mantene e lugar lo bin posiblemente cu un tarifa pa ora. E profesionalnan cu ta duna les priva y kier haci uso di e facilidadnan lo paga mas caro cu esnan amateur cu no ta paga pa tuma les.

COSTO DI CONSTRUCCION: Centro Deportivo Playa a costa riba 5 milyon florin, y como tal, no ta dificil pa compronde e pakico e fundacion mester genera fondonan pa su maneho y mantenimiento.

PROME AUXILIO: Tambe Centro Deportivo Playa ta conta cu un sala di EHBO y Masashi, si na dado momento algun alumno (of otro usuario) ta haya problema, p.e di hiperventilacion, algun accidente chiquito, etc. Den e sala di deporte y gimnasia no tin aire acondiciona debi cu haci gimnasia ta pa genera calor di curpa y transpira, pero e espacio ta hopi amplio y a pesar cu por sinti calor, aire ta circula.

Fuera di esey pone aire acondiciona den henter e compleho lo ocasiona un gasto enorme, y ademá cu transpiracion di gruponan grandi den aire acondiciona no ta bon pa salud.

SALA DI BODY BUILDING: E sala di Body Building no ta mucho grandi pero e ta hopi bon equipa y ta conta tambe cu su respectivo bañonan.

CAMBERNAN PA CAMBIA PAÑA: Pa cambia paña y haci uso di baño tin dos ala, uno pa hende muher y otro pa hende homber.

Prome cu e conferencia di prensa, Sr. Kolfin a menciona na DIARIO cu ningun hende homber, ni e docentenan mes, mag pasa den e pasiyo unda e cambernan pa hende muher ta ubica. Esaki pa mantene e respet, disciplina y decencia den e lugar.